

Fundacion FEDAA a cumpli 5 año di existencia

ORANJESTAD (AAN): Di adomingo ultimo a tuma luga celebracion di e prome lustro di Fundacion pa Esnan cu Deficiencia Auditivo Aruba (FEDAA). Esaki a tuma luga na MFA na Paradera den presencia di entre otro gobernador di Aruba, sr. Alfonso Boekhoudt, Minister di Enseñansa, Ciencia y Desaroyo Sostenibel, miembronan di e fundacion y demas invitadonan. Stella Montsanto, un di e fundadornan y actual presidente di e Fundacion, a duna un palabra di bon bini na esnan presente y a duna un relato di e fundacion di e Stichting aki, cual danki na e cooperacion financiero di Rotary Club Rijswijk-Ypenburg di Hulanda, a mira luz di dia dia 11 di April, 2013.

Miembronan di directiva di FEDAA ta como lo siguiente. Fuera di e presidente Stella Montsanto, ta haya:

Sra. Cherly Arends Secretaria Señor Jean-Luc Croes Tesorero

Sra. Gladys Kock miembro di board

Sra. Vanssa Gutierrez miembro di board.

Tambe tin Señorita Stayce Franca kende ta un bolunario activo den e fundacion.

Tur ta traha voluntariamente cu hopi dedicacion y pasion pa e fundacion FEDAA.

Montsanto ta continua:

"Rotary Hulanda a mira e importancia pa yuda mi financieramente pa funda e fundacion pa yuda e personanan cu problema di oido aki na Aruba cu hopi nesecario. Pa esaki mi ta sumamente agradeci na Rotary Club Rijswijk-Ypenburg di Hulanda.

Ariba e dia special aki 11 di April 2013 e board di FEDAA algun persona cu problema di oido y e miembronan di Rotary Hulanda a wordo ricibi pa Notaris Taekema na su bufete. Notaris Taekema a ricibi nos brasa habri y tambe a pone su granito pa asina awe FEDAA por ta existi y huntu awe nos por celebra nos Prome Lustro.

Deficiencia Auditivo (sordura) no ta asina visibel pa mayoria di hende, comunidad no ta tene cuenta cu e personanan aki. Pues e grupo aki ta enfrenta hopi obstaculo cu ta stroba nan desaroyo y participacion optimalmente den nos comunidad.

Pa e persona cu deficiencia auditivo e "drempel" pa forma parti di comunidad ta hopi halto, y den diferente situacion tin biaha nan ta wordo discrimina.



Riba diferente tereno nos fundacion ta brinda ayudo F.E.D.A.A. ta fungi como "E BRUG" cu ta haci tur su esfuerso pa facilita e

- Participacion,
- Aceptacion y integracion pa e personanan cu deficiencia auditivo den nos comunidad.

Fundacion FEDAA tin como meta pa entre otro defende e derechonan di e persona cu deficiencia di oido, Wak nan necesidadnan, Educacion, Duna guia, Consejo, Formacion, Señala y traha riba e problemanan relaciona cu perdida di oido. Problema di comunicacion, Discriminacion, Problema social, Laboral, Criminalidad, Economico. Tin scarsedad na informacion tanto den nos comunidad como den e comunidad di e persona cu problema di oido. Aki FEDAA ta traha pa duna informacion necesario cu ta importante pa e persona cu perdida di oido mes, y mas importante na su famia, círculo di trabao y tambe personanan interesa.

F.E.D.A.A. ta organisa y ta traha huntu cu su miembronan ariba diferente actividad, p.e. organisa diferente workshops, anochi informativo, educativo, actividadnan social, curso, enz.

E necesidad mas grandi pa e personanan cu deficiencia auditivo ta un espacio/luga unda por reuni, bin huntu. Unda nan por bay pa volg curso pa eleva nan potencialnan y posibilidadnan. Unda nan tin contacto social cu ta hopi importante pa e grupo aki, tin di nan ta biba isola.

FEDAA ta traha cu diferente instancia y fundacion esaki ta netamente pa haya e ayudo profesional avansa di e instancia pa e miembronan di FEDAA. Ora e miembro bin aki na oficina y ta aserca

y confia nos cu cualkier problema, nos ta yuda te na unda nos por y si mester di ayudo mas profesional avansa nos ta shakkel in por ehempel; Si ta encera trabao nos ta traha huntu cu e Jobcoach di Trampolin pa Trabao. Tambe ta traha huntu cu Sociale zaken pa cu e problemanan social cu ta un di e problema mas principal cu mester wordo atendi.

FEDAA ta traha tambe cu Bureau Sostene Mi y asina mi por sigui mencion, tin mas instancia y Fundacion cu ta brida FEDAA ayudo profesional.


FEDAA ta forma part tambe di e organisacion: Plataforma pa Persona cu Limitacion. (PPL) Den e organisacion aki tin diferente Fundacion cu ta traha huntu y ta uni forsa pa defende e derechonan y traha na bienestar di e persona cu diferente forma di limitacion den nos comunidad.

FEDAA tin su oficina aki na MFA-Paradera. Esaki ta un concepto ideal pa nos fundacion, nos ta sumamente agradeci cu FEDAA tin nos oficina aki den. Esaki ta un algo hopi positivo unda nos por integra e personanan cu deficiencia auditivo den nos comunidad.

Netamente aki fundacion ta comparti e vision y ta wak e parti positivo di loke MFA-Paradera ta y tin pa ofece e personanan cu deficiencia auditivo.

Cu un espacio/oficina den MFA Paradera nos fundacion ta traha mas eficientemente y por optimalisa nos servicio pa e personanan cu deficiencia auditivo.

Aki na MFA-Paradera nos miembronan lo intercambia y lo ta huntu cu personanan den nos comunidad cu ta haci uzo di tur local MFA Paradera tin cu ofrece. p.e. biblioteca, computer, cafetaria, sala



pa reuni, duna lezing, curso enz. Aki nos ta papia di integracion di e sordonan den e comunidad cu esnan cu si tin nan oido.

Fundacion F.E.D.A.A. ta sigur cu e proyecto aki lo ta un proyecto bunita y cu lo bira sigur un bunita ehempel pa comunidad henter. Sigur lo wak su frutonan di inclusion, intercambio y colaboracion entre e dos gruponan aki. Esaki ta un proceso Hopi necesario den nos comunidad.

Cu un espacio/oficina na MFA Paradera huntu nos lo saca e personanan cu deficiencia di oido for di nan isolacion y duna nan oportunidad di desaroya y di forma parti di nos comunidad cual cu nan tin derecho ariba dje, mescos cu cada ciudadano di nos pais.

Den e añanan cu a pasa nos a siña hopi y a haya hopi experiencia y a enfrenta hopi reto tanto positivo y negativo. Pero e satisfaccion mas grandi ta, di sa cu tur nos miembronan cu tin actualmente ta contento y satisfecho y orguyoso cu e logronan di nan fundacion y ta haya hopi necesario pa tin un fundacion unda nan por bin pa ayudo y intercambio.

Cada actividad cu FEDAA organisa ta bin caranan nobo y esaki ta local nos Fundacion ta desea. Tin persona cu problema di oido cu ta biba isola sin ningun ayudo, tin cu no tin trabao. Esaki ta e parti peligroso cu ta pone cu nan ta haya mal amigo y ta cay den e parti negativo di bida.

Cual ta dorga, criminalidad, ect. Mas peligroso ta isolacion, e parti doloroso aki Fundacion FEDAA a experiencia.

Pero FEDAA tin e parti hopi positivo y bunita cual ta e deseo cu miembronan tin, esaki ta di tin un trabao nan kier traha, nan no kier cobra onderstand, nan ta desea di

participa y aporta nan Pais.

FEDAA tin miembro cu si ta fuerte para den nan sapato y ta bringa pa nan derecho. Esaki ta e miembronan cu ta un ehempel bunita pa otro miembro den nos Fundacion.

Por ehempel; Miembro cu tin 25 año of mas trahando, tin un cu ta manager y a ricibi diferente awards pa e trabao excelente cu e ta eherce.

E miembronan aki ta yuda y stimula e otro miembronan, muestra nan cu nan tambe por logra. Esaki ta e parti bunita di FEDAA.

E meta final di FEDAA ta; Pa e persona cu problema di oido alcanza un posicion igual den nos comunidad unda e identidad propio di e hende sordo/cu problema di oido ta keda manteni.

F.E.D.A.A. ta boga pa cada; Baby, Mucha, Hoben y Adulto cu problema di oido aki na Aruba por ricibi e mihó guia posibel pa asina e por funciona optimalmente den nos comunidad.

Aki ta importante e parti di educacion pa asina nan por forma un bon base pa por sigui desaroya den cualkier ramo laboral.

Un di e trabaonan mas importante di World Federation of the Deaf ta, pa defende y pa pone na prome luga y segura e importancia di e derecho di e persona cu limitacion di oido rond henter mundo, esaki den tur e aspecto di nan bida.

Nan tin derecho ariba un bon educacion, actividadnan social, deportivo, economico, arte y musica mescos cu cada ciudadano di nos pais.

FEDAA ta desea un comunidad cu ta salí for di e punto di bista di e posibilidadnan di e persona cu problema di oido y NO enfoca solamente ariba su discapacidad."